

康南海先生遺著彙刊
(九)

蔣貴麟 主編

禮長桂書

興學
運
答學

筆記問鏡

蔣貴麟

主編

宏業書局印行

禮長桂書

興學

運

學答

筆記問鏡

康南海先生遺著彙刊

(九)

YD 12/07

禮

運

注

禮運注叙

大漠也鉅海也泛之而無涯行之而無途杳杳茫茫入之迷方失路以悲漂泊可傷者皆是也浩乎孔子之道蕩蕩則天六通四闢其運無乎不在然以其曠博浩瀾舉二千五百年之綿蕪合四萬萬人民之繁衆并日本高麗安南之同文立於學官著爲國教誦之讀之尊之服之而蒼蒼無正色渺渺無終極欲實爲孔子之至道也莫可得而指也人好其私說家修其舊習以多互證以久相蔽以小自珍始誤於荀學之拘陋中亂於劉歆之僞謬末割於朱子之偏安於是素王之大道闇而不明鬱而不發令二千年之中國安於小康不得蒙大同之澤耗矣哀哉予小子六歲而受經十二歲而盡讀周世孔氏之遺文乃受經說及宋儒先之言二十七歲而

盡讀漢魏六朝唐宋明及國朝人傳注考据義理之說所以考求孔子之道者既博而劬矣始循宋人之途轍炯炯乎自以爲得之矣既悟孔子不如是之拘且隘也繼遵漢人之門徑紛紛乎自以爲踐之矣既悟其不如是之碎且亂也苟止於是乎孔子其聖而不神矣既乃離經之繁而求之史凡數千年國家風俗治亂之故若者與孔教相因而進退者得之於戰國秦漢之間東漢爲美矣以爲未足盡孔子之道也既乃去古學之僞而求之今文學凡齊魯韓之詩歐陽大小夏侯之書孟焦京之易大小戴之禮公羊穀梁之春秋而得易之陰陽之變春秋三世之義曰孔子之道大雖不可盡見而庶幾窺其藩矣惜其彌深太漫不得數言而眩大道之要也乃盡舍傳說而求之經文讀至禮運乃浩然而嘆曰孔子三世之變大

道之眞在是矣大同小康之道發之明而別之精古今進化之故神聖憫世之深在是矣相時而推施並行而不悖時聖之變通盡利在是矣是書也孔氏之微言眞傳萬國之無上寶典而天下羣生之起死神方哉天愛羣生賴以不泯列聖呵護幸以流傳二千五百年至予小子而鴻寶發見闢新地以殖人民揭明月以照修夜以仁濟天下將納大地生人於大同之域令孔子之道大放光明豈不異哉康有爲乃獵纓專枉而正言曰吾中國二千年來凡漢唐宋明不別其治亂興衰總總皆小康之世也凡中國二千年儒先所言自荀卿劉歆朱子之說所言不別其眞僞精粗美惡總總皆小康之道也其故則以羣經諸傳所發明皆三代之道亦不離乎小康故也夫孔子哀生民之艱拯斯人之溺深心厚望私欲高懷其注於

大同也至矣但以生當亂世道難躡等雖默想大平世猶未升亂猶未撥不能不盈科乃進循序而行故此篇餘論及它經所明多爲小康之論而寡發大同之道亦所謂知其不可而爲之者耶若其發禮意之本極天人

之故抑可以擇先聖制作之意焉幼孩不能離襁褓蒙學不能去嚴師害飢渴者當醉飽以濟其虛不能遽與八珍病傷寒者當滌蕩以去其邪不能遽投參朮亂次以濟無翼以飛其害更甚矣若子弟成人尙必服以襁褓寒邪盡去尙不補以參苓泥守舊方而不知變永因舊曆而不更新非徒不適於時用其害且足以死人今者中國已小康矣而不求進化泥守舊方是失孔子之意而大悖其道也甚非所以安天下樂羣生也甚非所以崇孔子同大地也且孔子之神聖爲人道之進化豈止大同而已哉莊

子建德之國列子甌甌之山凡至人之所思固不可測矣而況孔子乎聖人之治如大醫然但因病而發藥耳病無窮而方亦無窮大同小康不過神人之一二方哉竊哀今世之病搜得孔子舊方不揣愚妄竊用發明公諸天下庶幾中國有瘳而大地羣生俱起乎其諸好學高識之君子有以正之孔子二千四百三十五年卽光緒十年甲申冬至日康有爲叙

禮運注

南海康有爲著

鄭玄目錄云名禮運者以其記五帝三王相變易陰陽轉旋之道愚按孔子之道有三世有三統有五德之運仁智義信各應時而行運仁運者大同之道禮運者小康之道撥亂世以禮爲治故可以禮括之禮者猶希臘之言憲法特兼該神道較廣大耳此篇明孔子禮治之本大義微言多在學者宜思焉

昔者仲尼與於蜡賓事畢出遊於觀之上喟然而歎仲尼之歎蓋歎魯也言偃在側曰君子何歎

蜡索也歲十二月大祭合聚萬物而索饗之祭坊水庸曰土反其宅水

歸其壑昆蟲毋作草木歸其澤黃衣黃冠而祭以尊野服報耑嚮農及
郵表啜禽獸故諸侯貢者草笠而至四方年不順成八蜡不通以謹民
財順成則通蜡以移民既蜡而收民息已秦漢以後曰臘觀者臺門上
之闕 何氏休曰天子兩觀外闕諸侯臺門漢未央宮北爲闕今午門
五鳳樓是也以懸法象者蓋古俗始於爭戰故壘門必爲望樓其後建
國爲君因用爲飾今埃及錄士京古宮兩觀中闕猶存可推考吾古制
鄭玄曰蜡兼祭宗廟時孔子仕魯在助祭之中疑孔子相魯時也孔子
以羣生同出於天一切平等民爲同胞物爲同氣故常懷大同之志制
太平之法而生非其時不能遽行其大道適遇蜡祭諸侯大夫皆草笠
野服至平之服矣饗農息民下及禽獸昆蟲草木水土以告歲功至平

無差等乃太平之禮至仁之義故觸其大同之思而時當亂世魯雖用已未能行己之大道故觸事發歎也言偃孔子弟子字子游荀子非十二子篇稱仲尼子游爲茲厚於世以子游與仲尼並稱且以子思孟子同出於子游蓋子游爲傳大同之道者故獨尊之此蓋孔門之秘宗今大同之道幸得一傳以見孔子之真賴是也

孔子曰大道之行也與三代之英丘未之逮也而有志焉大道之行也天下爲公選賢與能講信修睦故人不獨親其親不獨子其子使老有所終壯有所用幼有所長矜寡孤獨廢疾者皆有所養男有分女有歸貨惡其棄於地也不必藏於己力惡其不出於身也不必爲己是故謀閉而不興盜竊亂賊而不作故外戶而不閉是謂大同

歸舊本作歸

大道者何人理至公太平世大同之道也三代之英升平世小康之道也孔子生據亂世而志則常在太平世必進化至大同乃孚素志至不得已亦爲小康而皆不逮此所由顧生民而興衰也天下爲公選賢與能者官天下也夫天下國家者爲天下國家之人公共同有之器非一人一家所得私有當合大衆公選賢能以任其職不得世傳其子孫兄弟也此君臣之公理也講信修睦者國之與國際人之與人交皆平等自立不相侵犯但互立和約而信守之於時立義和親康睦只有無詐無虞戒爭戒殺而已不必立萬法矣此朋友有信之公理也父母固人所至親子者固人所至愛然但自親其親自愛其子而不愛人之親不

愛人之子則天下人之貧賤愚不肖者老幼矜寡孤獨廢疾者皆困苦顛連失所教養矣夫人類不平則教化不均風俗不美則人種不良此爲莫大之害卽中於大衆而共受之且人人何能自保不爲老幼矜寡孤獨廢疾乎專待之於私親而無可待也不如待之於公而必可恃也故公世人人分其仰事俛畜之物產財力以爲公產以養老慈幼卹貧醫疾惟用壯者則人人無復有老病孤貧之憂俗美種良進化益上此父子之公理也分者限也男子雖強而各有權限不得逾越歸者魏也女子雖弱而巍然自立不得陵抑各立和約而共守之此夫婦之公理也更有二禁世有公產則巧者仰人之養而不謀農工之業惰者樂人之力而不出手足之力以公成其私而以私壞公則大道墮矣故不作

業不出力之人公衆所惡然將已刑措但惡之以示不齒而人聳勸矣
然化俗久美傳種改良人人自能去私而爲公不專己而愛人故多能
分貨以歸之公出力以助於人然人之恆言曰天下國家身此古昔之
小道也夫有國有家有己則各有其界而自私之其害公理而阻進化
甚矣惟天爲生人之本人人皆天所生而直隸焉凡隸天之下者皆公
之故不獨不得立國界以至強弱相爭並不得有家界以至親愛不廣
且不得有身界以至貨力自爲故祇有天下爲公一切皆本公理而已
公者人人如一之謂無貴賤之分無貧富之等無人種之殊無男女之
異分等殊異此狹隘之小道也平等公同此廣大之道也無所謂君無
所謂國人人皆教養於公產而不恃私產人人卽多私產亦當分之於

公產焉則人無所用其私何必爲權術詐謀以害信義更何肯爲盜竊
亂賊以損身名非徒無此人亦復無此思內外爲一無所防虞故外戶
不閉不知兵革此大同之道太平之世行之惟人人皆公人人皆平故
能與人大同也

今大道旣隱天下爲家各親其親各子其子貨力爲己大人世及以爲禮
城壑溝池以爲固禮義以爲紀以正君臣以篤父子以睦兄弟以和夫婦
以設制度以立田里以賢勇智以功爲己故謀用是作而兵由此起禹湯
文武成王周公由此其選也此六君子者未有不謹於禮者也以著其義
以考其信著有過刑仁講讓示民有常如有不由此者在執者去衆以爲
殃是謂小康

殃禍惡也孔子自慨當時至公太平之道隱而未明鬱而未發天下皆自私其家君主不能公天下乃以天下爲一家私有之物今雖明父慈子孝之義亦異於亂世野蠻不知父子者然僅自私所親不能錫類推仁以平天下也雖能作力運貨百業興於文明然祇自營己私不能爲公故無公產公功以興公益貧愚老疾者不得齊於人類俗弊種壞富貴者亦不得免焉天子諸侯大夫世之大人也不能讓賢選能始以武力得國家後則私據之或世傳子孫或兄終弟及造作禮典定爲名義以絕奸雄覬覦盜篡之端以免歲月易朝爭殺之禍較之亂世人爲帝而家爲王爭殺無已者民生易保焉然以天下國家之重任不公選天下之賢而全託之一家一人之子孫夫人之生子安得盡賢苟所生非